

Venerdì 12 novembre 2021

Ausstell va letrattn BITM 2021 “Valle dei Mòcheni - la valle incantata”

Va de 16 finz as de 19 van òlderhaileng, bart se hòltn kan Muse va Trea't de XXII edizion van de B.I.T.M. – De ta van turismus van pèrng – as ist kemmen organiziat va de Confesercenti del Trentino.

Der tema va haier ist “Un'agenda per il nuovo turismo”. Der Coronavirus hòt gabèckslt s lem van lait va de gònze bèlt.

Haier der doi trèff bellet sai' a meglechkait ver za denken bos as hòt galeart de pèrng no de doi kronket ont abia as se mechet omport gem en de vrong van lait ont va de umbèlt aa. Zòmm pet en trèff van turismus, en sitz van Palazzo Roccabruna kimp organiziat an austell va letrattn van titl: “VALLE DEI

MÒCHENI - LA VALLE INCANTATA”.

De autorn sai' viara: Guido Benedetti, Luca Chistè, Francesco Franzoi ont Michele Vettorazzi. Turch de letrattn kontarn sa s inser tol, de lònschòft, de umbèlt ont de kultur va de inser gamoaschòft.

Guido Benedetti hòt probiat za kontarn bos as ist gabèckslt aile de jarder: bos as ist kemmen gahòltn, bos as ist gabèckslt, bos as ist bider paut kemmen ont bos as ist kemmen verlourn.

Luca Chistè kontart ens van kloa'n oubst ont va bos as bell song ver de umbèlt ont ve de lònschòft van tol.

S sai' de lait ont de hòtbercker de haupfiguren

van letrattn van Francesco Franzoi.

Ont zan leistn, de letrattn van pèrng en aos/schbòt van Michel Vettorazzi.

A naiket va de doi edizion va de B.I.T.M. ont va de ausstell ista s a toal letrattn sai' gamòcht kemmen van mittoal van kurs va fotografi as ist kemmen organiziat en tol.

De ausstell kimp vourstell en de lait mornng um oadleva de vria.

De bart offet sai' va de 15 finz as de 19 van òlderhaileng ont va de 20 finz as de 31 van schanmikeal pet de doi offetzaitn: der ma'ta, der eirta ont der mitta va um òchta ont a hòlbs de vria finz za mitto ont va um zboa finz um vinva nomitto.



Der pfinsta ont der vraita, va um òchta ont a hòlbs de vria finz za mitto ont va um zboa finz um òchta zobenz.

Der sònsta va um vinva nomitto finz um òchta zobenz.

Ont va de 20 van òlderhailtn finz as de 19 van schanmikeal: der ma'ta, der eirta ont der mitta va um òchta ont a hòlbs de vria finz za mitto ont va um zboa finz um vinva nomitto. Der pfinsta ont der vraita, va um òchta ont a hòlbs de vria finz za mitto ont va um zboa finz um òchta zobenz. Der sònsta ont der sunta, va um oadleva de vria finz um oa's nomitto.

LORENZA GROFF